

TE HEEHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 6.

Tiunu 1927.

Mat. 21.

Ua parau atura Petero ia ratou, E tatarahapa, e ia baptizohia outou atoa i roto i te i'oa o Iesu Mesia ia matara te hara, e horoahia mai ia te Varua Maitai ia outou. (Ohipa 2:38)

Te Faaroo no te Feia Mo'a Mau.

Ua iritihia teie nei parau na roto mai i te buka, Te Faaroo no te Feia Mo'a Mau tei papaihia e Tamate; Faaauhia ei reo Tahiti e Ioane Orotona.

*Te faaroo nei matou e, o taua mau faaueraa ra; * * *
te piti ra, te tarahaparaa ia; * * **

Uiraa 1. Eaha na mea e piti tei faatupu i te tatarahapa?

P. Tera mai ia te pahonora, oia hoi, 1. Faaroo i te Atua, 2. Haehaa o te aau.

Parau Tauturu: Ua riro te tatarahapa ei tumu piti no te faaroo. Ia tae te ite i roto i te taata, i te huru o te Atua, e ua ite oia e, te vai mau ra te mana o te Atua i nia iho i te taata; i reira to'na iteraa e, e taata paruparu oia, e e mana han ê to te Atua. Na roto i te reira, ua faatura oia i te mau ture o te Atua, na roto i te haapao maitai. E na roto hoi i to'na tatarahaparaa, ua tupu te hinaaro i roto ia'na i te tavini e/auraro maite i te Atua, e na teie hinaaro e faaore i te ino i roto ia'na. E i muri iho, e imi ia oia i te

ravea e itehia'i te huru no to'na tatarahaparaa, no reira, e imi oia i te ohipa maitai i te mau taime atoa.

Uiraa 2. Eaha na mea e toru ia ravehia e tia'i, ia fariihia to te taata tatarahaparaa?

P. Tera mai ia te pahonora, 1. To te taata hara faí-raa'tu i ta'na mau hara. 2. To'na faaoreraa i te mau hara, ta vetahi mau taata i rave mai ia'na. 3. To'na fariiraa i te taraehara o Iesu Mesia na roto i te haapaoroa i te mau ture.

Parau Tauturu: 1. To te taata fa'iraa'tu i ta'na mau hara. Ia faí te taata i ta'na mau hara e tia'i, ia ore oia e na reira, aita ia to'na tatarahaparaa e fariihia. Ua parau maira Ioane e, "Ia parau tatou e, aita â tatou e hara, te haavare nei tatou ia tatou iho, e aore te parau mau i roto ia tatou nei. Ia faí râ tatou i ta tatou hara, e parau mau ta te Atua e tia i te faaoreraa mai i ta tatou hara, e te tamâ-raa ia tatou i te mau parau tia ore atoa." (I Ioane 1:8-9) Te na ô maira te tabi parau e, "O tei tapoi i ta'na hara, e ore ia e maitai; o tei faí râ, e ua faarue, e arohahia ia." (Maseli 28:13) Ua parau faahou maira te Atua e, "Na teie e faaite ia outou, ua tatarahapa mau te taata, inaha e faí oia i ta'na mau hara, e e faarue oia i te reira." (B. F. 58:43)

2. To te taata hara faaoreraa i te mau hara ta vetahi mau taata i rave mai ia'na. E mea faufaa ore to te taata taatarahaparaa mai te mea, te vai nei â te inoino i roto i to'na aau. Ua haapii maira Iesu e, "E faaore mai i ta matou hara, mai ia matou atoa e faaore i tei hara ia matou nei," (Mataio 6:12) Mai te au i teie parau a Iesu, aita ia ratou hara e faaorehia, maori râ, ia faaore ratou i te mau hara a tei hara mai ia ratou ra. No te mea, ua na ô faahou maira oia e, "Ia faaore hoi outou i ta vetahi ê ra hapa, e faaore atoa mai to outou Metua i te ao ra i ta outou. Ia ore râ outou ia faaore i ta vetahi ê ra hapa, e ore atoa to outou Metua e faaore mai i ta outou hapa." (Mataio 6:14-15) Ia

faaore noa tatou i te hara a to tatou mau taata tupu e tia'i, no te mea, ua pahono atura Iesu i ta Petero uiraa i te na ô raa'tu e, "Aita vau i parau e hitu, e hitu râ i te ahururaa."

E te auraa ia, faaore i te mau hara a te tahi mau taata i te mau taime atoa. Ua hinaaro Iesu ia ite papu ta'na mau pipi, ia faaore ratou i ta vetahi ê mau hara e tia'i, no reira, ua tuu atu oia i te parabole ia ratou, no te hoé arii, e e tarahu hoi ta to'na tavini ia'na, hoé ahuru tausani talene te rahiraa. No reira, ua arataihia oia i mua i te arii, faahaehaa ihora teie tavini ia'na iho i mua i te arii, e no te aroha o te arii i faaore ai oia i ta'na tarahu. Haere atura teie tavini i rapae, e fariore ihora i te hoé taata tei tarahuhia ia'na ra. *but*

farerei
ia Haru ihora oia i teie taata, e huri atura ia'na i roto i te fare tapearaa, ia aufau oia i ta'na tarahu. Faaroo aéra te arii i tei ravehia e taua tavini ra, e ua faahapa'tura oia i taua tavini ra, e ua horoa'tura ia'na i te feia tapea. *out* E ia oti taua parau ra i te parauhia e ana, ua na ô maira oia e, "E na reira'toa mai tau Metua i te ao ra ia outou atoa na, ia ore outou ia faaore ma te aau atoa i te hapa a to'na taeae."

(Matao 18:35) E i teie mau mahana hopea nei, ua parau faahou maira te Fatu, na ô maira, "No reira te parau atu nei an ia outou, ia faaore te tahi i ta te tahi e tia'i, o tei ore hoi i faaore i te hapa a to'na ra taeae, te vai faahapahia ra oia i mua i te Fatu, no te mea te vai ra i roto ia'na te hara rahi. E faaore au o te Fatu i ta'u i hinaaro i te faaore, te titaunia atu nei râ outou ia faaore i te hapa a te taata'toa." (Buka Fafau S. 64:2)

3. To te taata hara fariiraa i te taraehara o te Mesia na roto i te haapaoraa i te mau ture. Na roto i te i'oa o Iesu Mesia e ora'i te taata nei, e ua haapiihia tatou i te pure atu i te Atua, na roto i te i'oa o Iesu Mesia. Na te hoé melahi a te Atua i haapii ia Adamu i te reira, (Buka Poe Taoá Rahi Mose 5:6-8), e na Iesu iho te reira i haapii atu i te Ati Nephi. (II Nephi 27:5-7) Aita hoi e nehenehe i te hoé taata ia

faaroo ia Iesu Mesia, maori râ, na roto i te haapaoraa'tu i te mau ture na'na ra. Aita â i oti to te taata tatarahaparaa, na roto i to'na faíraa'tu i ta'na hara, e ere hoi te tatarahapa te oto-noa-raa e te parauraa'tu i te mau parau e rave rahi. I roto râ i te aaui e tatarahapa'i te taata, e na te reira e faatupu i to'na riáriá i te ino. No reira e tupu te opuaraa papu i roto ia'na e, eiaha oia ia na reira faahou. Ia na reira te taata i te oto i roto ia'na, ua au ia i te parau ta Paulo i parau ra e, "O te oto hoi e au i te Atua ra, e faatupu ia i te tatarahapa e tae noa'tu i te ora, eita ia e tatarahapahia; area te oto o teie nei ao, e faatupu ia i te pohe." (II Korinitea 7:10)

Ua na ô maira Orosona Paraita e, "E mea faufaa ore i te taata, ia faí atu i ta'na hara maori râ, te opua ra oia i te faaore i te reira hara, e mea faufaa ore hoi ia oto oia no to'na raveraa i te hara, maori râ, e opua papu oia e, eita oia e na reira faahou. No reira, te tatarahapa ra, o te faíraa ia i te hara, ma te aaui haehaa e te oto, ma te opuaraa papu, eita oia e na reira faahou."

Uiraa 3. O vai te mau taata tei ore e tia ia ratou ia tatarahapa?

P. Aita e taata, maori râ, te mau tamarii anaé o tei ore i tae i te vaú o te matahiti.

Parau Tauturu: Na roto i te tatarahapa e tae mai ai te mau haamaitairaa i nia iho ia tatou. Teihea te taata hara ore? Ua na ô maira te hoé peropheta tahito e, "Aita mau e taata parau tia i te fenna nei, o te rave i te parau maitai, e aore roa e hara." (Kohéleta 7:20) Ua parau maira Isaia e, "E imi outou ia Iehova, oi itea'é oia, e tiaoro ia'na, oi faatata mai oia; e faarue te paieti ore i to'na haerea, e te taata parau tia ore i to'na manaó: á hoí ai oia ia Iehova, e na'na oia e aroha mai; e hoí i to tatou Atua, te rahi ra hoi ia'na te faaore i te hara." (Isaia 55:6)

Ua maitihia te mau tavini o te Atua i te mau tau atoa ei parau haere i te tatarahapa. Ua faaroohia to Ioane reó

i te medebara i te piiraa'tu i te tatarahapa, (Mareko 1:15) e te mau aposetolo atoa hoi. (Ohipa 17:30) E i teie mau mahana hopea nei ua tae mai te parau no te tatarahapa ia tatou. (B. F. 20:29)

Uiraa 4. Eaha te hoé mea tei haaparuparu i te manaó no te tatarahapa?

P. Tera hoi ia maori râ, te rave-noa-raa i te hara.

Parau Tautura: Ua riro te tatarahaparaa ei haamai-tairaa i nia iho i te taata nei. Aita râ te reira e roaa, na roto i te aniraa anaé, aita'toa ia e iteahia i nia i te puramu, area râ, e horoa-noa-hia mai te reira ia ratou tei tuu i te ohipa au no te tatarahapa. (Mataio 3:7-8) Mai te mea e faaineine te taata ia ratou iho no te tatarahapa, e arataihia ia ratou e te Varua Maitai. I te taima i paribia'i Petero no to'na tomoraa i rotopu i te etene, ua faaite atura oia i te hurn no te orama ta'na i te, ua faaroo maira ratou, e ua na ô maira, "Ua horoa'toa maori te Atua i te tatarahapa ora i te etene." (Ohipa 11:18) Ua haapii atoa Paulo. ua roaa mai te tatarahapa na roto i te maitai o te Atua. (Roma 2:4)

E horoahia mai te tatarahapa i te taata mai te au i te haehaa o to'na aau. e faaiteraa tera no te Varua i roto i to ratou aau. Ia ore râ e haapaohia te haapiiraa a te Varua, e faarue te Varua ia ratou, no te mea, aore te Varua o te Atua e mârô i te taata e a muri noa'tu. (Genese 6:3) No reira, a rave noa'i te taata i te hara, ua tupu te manaó paruparu no te tatarahapa. Mai te mea râ, e faahaehaa te taata ia ratou iho i mua i te Atua, e tupu ia to'na faaroo, e na roto i taua na mea nei e roaa'i ia'na te tatarahapa. Ua parau maira te Fatu ia Iosepha Semita e "e ore roa hoi e tia ia'u ia Iehova ia hió marû noa'tu i te rave hara; area râ hoi, o tei tatarahapa, e na haapao i te mau faa-ueraa a te Fatu e faaorehia ia ta'na hara; area o tei ore i tatarahapa ra, e ravehia mai ia te maramarama i noa mai ia'na ra, e ore hoi ta'u varua e titau mârô mai i taata nei e a muri noa'tu, te na reira maira hoi Ie-

hova Sabota." (B. F. S. 1:5)

Uiraa 5. E nehenehe anei i te taata ia tatarahapa i muri aé i te pohe?

P. E nehenehe hoi i te tahi pae ia tatarahapa.

Parau Tauturu: Ua parau maira Alama e, e tau tatarahapa teie no te taata nei, e tau faaineineraa hoi i te farerei atu i te Fatu, area râ, na roto i te mau parau papai, e ite ai tatou e, te vai ra te ravea e tatarahapa i te taata i muri aé i te pohe. I tera na mahana e toru ra, a vai ai te tino o te Mesia i roto i te menema, i haere atu ai oia e aó i te Evanelia i te mau varua i tapeahia i Paradaiso, o tei haapao ore i te tau no Noa, e ua aó atu i te Evanelia ia ratou, ia haavahia ratou mai te taata atoa i te tino nei. (B.F. 76:73)

E ere râ te mea tia ia haamaoro te hoé taata i to'na tatarahaparaa, no te mea, aita tatou i ite i te ravea i horoahia ai te tatarahaparaa i te feia i tapeahia ra. Area te taata tei hara tamau noa i roto i teie nei ao, e tei patoi noa mai i te maitai o te tatarahapa, eita ia taua taata ra e farii ohie noa i te ravea no te tatarahapa, ia tae oia i taua ao ra. No te mea, a na reira noa i te taata nei, te riro nei ratou i te mana faatere o Satani. Ua haapii maira Amuleka e, "Inaha hoi, tei teie nei oraraa te taime ia faaineine te taata ia farerei i te Atua; * * * no reira te aó atu nei au ia outou e, eiaha outou e faaroaroa i te mahana o ta outou tatarahapa e tae roa i te hopea; * * * E ore e tia ia outou ia parau, a arataihia ai outou i taua hopea riáriá ra, e tatarahapa vau, e fariu vau i to'u Atua. Eita, e ore e tia ia outou ia parau i te reira; no te mea e mana â to taua varua, tei roto i to outou tino i te mahana e pohe ai outou ra, i nia i to outou tino i taua ao mure ore ra. Inaha hoi, ia faaroaroa outou i te mahana e tatarahapa ai outou ra, e ia tae mai i te pohe, ua riro outou ei tavini o te varua o te diaboló e e tamau oia ia outou no'na iho." (Alama 34:32-35)

Te Ravea e Roaa'i te Oaoa

EHAHA te mea e oaoa'i te taata nei? Nahea e roaa'i te oaoa ia tatou? O vai te taata i roto i teie nei ao tei ore i ani ia'na iho i teie uiraa? Ua imi te tahi pae taata i te faufaa o teie nei ao, peneiaé e riro te reira ei oaoaraa na ratou. Ua imi hoi te tahi pae i te oaoa na roto i te faaare-áreáraa ia ratou iho i te mau mahana'toa. Ua oaoa te tahi pae i roto i te ohipa i hamanihia e to ratou rima. Area râ, ua vai noa te huru mauruuru ore i roto i teie na huru taata. E e imi noa â ratou i te hoé mea, mai te ore i ite i te mea ta ratou e imi ra. Eaha râ te tumu? Na te aamu parau a Solomona e faaite papu ia tatou i te pahonoraa.

Teie taata o Solomona, e arii rahi oia no Iseraela. E vahine rau ta'na, e ua haapaohia to'na mau hinaaro atou, ua manaó-atoa-hia e, ua hau oia i te paari i te mau taata atoa i mua ia'na e tae noa mai i to'na ra anotau. Ua imi ihora teie taata i te pahonoraa tiá no te uiraa i papaihia i nia nei, oia hoi, "Eaha te mea e oaoa'i te taata i roto i teie nei ao?" Te na ô maira ta'na iho parau e, "Eaha ta te taata nei faufaa i noaa i ta'na atoa ra mau ohipa, ta'na e ohipa noa nei i raro aé i teie nei mahana?"

"Te ore nei te tahi ui, e te itea maira te tahi; area te fenua nei te vai noa nei â ia. Te hiti nei hoi te mahana, e te mairi nei i raro, e te oioi ra i te vahi i hiti mai ai oia ra. Te tere noa ra oia na te pae i apatoa, e mai reira hoi ua hoí maira i te pae i apatoerau. Te taninito haere noa nei â te mataí, e mai reira hoi ua taninito faahou â. Te tahe nei te mau pape atoa nei i raro i te tai, aita râ te tai i manii ê noa'tu: te vahi no reira mai te pape ra, te hoí faahou nei ratou i taua vahi mau ra. Te mau mea atoa e na reira ta ratou haapaoraa, aore roa e taata e tia'i ia taio ra; e ore hoi te mata e fiu i te hióraa'tu, e ore hoi te tariá e i ia faa-

roo atu. Eaha taua mea i tupu i mutaa'ihora, maori râ i teie e tupu faahou nei? eaha taua mea i ravehia ra, maori râ o teie e rave-faahou-hia nei? aore roa e mea apî i raro aé i te mahana nei. (Kohéleta 1:3-9)

Tera ia te manaó i tupu i roto i te feruriraa o Solomona. Aita e mea apî, eaha mau te faufaa o te mau mea atoa nei? Te rave-faahou-hia nei te mau mea tahito. Na roto i teie taninitoraa i te mau mea'toa nei, eaha te oaoa e roaa'i i te taata nei? Manaó ihora oia e, te arearea paha ia taua mea ra. Imi atura oia i te arearea, ua na ô maira to'na faaiteraa e, "Ua parau ihora vau i to'u iho aau, Haere mai, e tamata na i te arearea e imi hoi i te navenave: e inaha, e mea faufaa ore te reira." (Kohéleta 2:1)

No reira, aita i roaa te oaoa ia'na na roto i te arearea, no te mea, ua na ô maira oia e, e mea faufaa ore atoa te reira.

Manaó faahou maira oia e, e riro paha na roto i te ohipa e roaa'i te oaoa. Rave ihora oia i te ohipa rahi buru rau. Ua faatia oia i te mau fare rarahi e mea rahi. Ua rave itoito atoa oia i te ohipa faatereraa i roto i to'na ra hau. Aita râ te oaoa i roaa na roto i te reira no te mea, ua na ô maira oia e, "Ia manaó râ vau i taua mau ohipa i ravehia e tau rima ra, i te mau ohipa atoa i ravehia e au ra, inaha! e mea faufaa ore anaé, i amu noa na vau i te mataí! aore roa hoi e faufaa i raro aé i te mahana nei." (Kohéleta 2:11)

Te vai ra te hoé mea toe. Aita i roaa ia'na te oaoa na roto i te arearea e te ohipa, no reira, ua imi atura oia i te paari o teie nei ao, peneiaé, na te reira e faatupu i te oaoa i roto i to'na ra aau. No reira, ua haapii maite Solomona i te mau mea atoa o te ao nei, e ua riro oia ei taata paari roa i te mau taata atoa o to'na ra anotau. Aita râ e faufaa. Te na ô maira to'na faaiteraa e, "ua titau maite hoi au ia ite i te paari, e ia ite hoi i te maamaa e te haapao ore: e ite

ihora hoi au i te reira, e te amu ra vau i te mataí. 'Te rahi ra hoi te paari te rahi atoa ra te inoino, e o tei faarahi i to'na ite ra, ua faarahi ia i te oto.'" (Koheleta 1:17-18)

E mea fifi mau râ teie imiraa i teie mea ta'na i imi ra, e i te hopea o te mau mea i imihia e ana ra, aita â ia i iteahia te mea e oaoa'i. Te manaó nei anei tatou e, ua roaa te oaoa i te feia ona i roto i teie nei ao? Eaha tatou e vare. Noa'tu e, ua haapaohia to ratou mau hinaaro, e ua faaamuhia ratou i te maa maitai e ua ahū ratou i te ahū maitai, eiaha tatou e manaó e, ua roaa ia ratou te oaoa. Te pohe nei ratou i te hoé mai rahi. No te aha ratou e pohe nei? Aita anei ta ratou e raau? E aita anei e taote ia faaora ia ratou? Te vai ra te raau, te vai ra hoi te taote; aita râ ratou i ite i te raveá e tihia'i tava taote ra. E taua mai ra, o te nounouraa ia i te hoé mea tei ore i itehia e ratou ra, ia riro ia ei oaoaraa na ratou. E teie mau taata, aita ratou i ite i te tumu i fanauhia mai ai ratou i roto i teie nei ao. Ua farerei Solomonā i teie mau huru atoa i to'na imiraa'tu i te pahonoraā no taua uiraa ra, oia hoi, "Eaha te mea e oaoa'i te taata nei?" Ua itea ia'na te pahonoraā tia, e ua papaihia i te pene hopea o tana ra buka, e ua na ô maira taua parau ra e, "E tena na, e haamanaó i tei Hamani ia oe i to apíraa ra, aita i tae i te mau mahana ino ra, e aita i tae i te mau matahiti e parau ai oe ra e, Aita roa o'u e maitairaa.'" (Koheleta 12:1)

Aue te oaoa i roto i to tatou aau, a ite ai tatou e, te vai ra i pihai mai ia tatou te hoé Hoa o tei faaherehere noa mai e o tei tanturu noa mai hoi ia tatou i ta tatou mau ohipa atoa. O tei haere noa i pihai iho ia tatou i tera vahi e i tera vahi. E Oia atoa tei aratai ia tatou i te maitai. No reira, ia imi te taata ia'na e tia'i. E ia haamanaó hoi ia'na i to ratou apíraa e tia'i, ia roaa te oaoa ia ratou.

Papaihia e --Ioane Orotona

Te Mau Parau Apî

Te vai ra e hoé ati taata ereere i te fenua ra i Dutch Guiana, i Amerika Apetoea, te noho noa nei ratou i roto i te hoé vahi moemoe i roto i te medebara. I teie nei mau mahana i faaroo ai ratou e, ua tupu te tamaí rahi i mairi aénei i rotopu i te mau Hau atoa no te ao nei, e ua oti maitai taua tamaí ra. Ua papai to ratou raatira rahi i te hoé rata ia Sir Eric Drumond, oia te papai parau no te mau Hau amui. Te na ô maira taua rata ra e, "I teie nei ua faaroo matou i te tamaí rahi a te mau taata no te mau fenua atea ê ra. E te ite nei matou i te mau mea iino roa tei tupu i roto i taua tamaí rahi ra. Te oaoa nei râ matou i te mea e, ua oti maitai taua mau peapea rahi ra, e te parau atu nei matou ia outou na e, eiaha e taparahi te tahi i te tahi, e faaea râ outou ma te hau. Te faaite atu nei matou i teie nei mau parau ma te aau haehaa e te aroha e aore ma te manaó teoteo."


Te imi nei te mau taata paari i te hoé mono no te farii punu no te maa, no te mea e, ua varavara roa te punu i teie mau matahiti e ua haere atoa te moni no te punu i nia rii. Ua iritihia mai na roto mai i te fenua, e hoé hanere e maha ahuru e ma toru tauatini e pae hanere e piti ahuru e ma piti (143,522,000) tone punu i te matahiti i mairi aénei, e ua pau e hoé hanere e hoé ahuru e ma iva tauatini e piti hanere aore ahuru e ma hoé (119,201,000) tone i te mau taata amui maa i roto i te punu. Na roto i to ratou imiraa ua hamani ratou i te tahi mau farii parau, e i te tamaí rahi i mairi aénei, ua afaihia te jamu e te tahi atu â mau huru mau i roto i te mau farii parau; e i roto i te tahi mau oire i te fenua Marite, i afaihia'i te û puaatoro i roto i te mohina parau. Te vai nei râ te hoé mea ino no te mea ua paraehia te hiru i nia iho i te parau e no reira e amu te mau iore i te reira e haere i roto roa i te maa i roto i te farii.

Ua riro te rê no te tairiraa popo (tennis), i te hoé taata Farani, o Jean Borotia to'na i'oa. Ua faaterehia taua hatiraa ra i te tufaa fenua New York, i te fenua ra i Marite. Ua tamata oia raua te hoé taata Marite ia riro te rê e ua riro atura i te taata Farani.

I te 25 no Mati ua papai atu te Hau Marite i te hoé parau i na raatira rahi o tei faatere i te mau pahi tamaí i te fenua Tinito. Ua tonohia taua mau pahi tamaí ra i te fenua Tinito mai te manaó e, e paruru maite ratou i te mau taata e te mau faufaa no Marite. I roto i te hoé apooraa rahi no te mau taata faatere hau i te fenua Marite i papaihia'i taua parau ra, e ua riro te reira ei faaiteraa papu e, e tauturu te hau ia ratou e e tiaturi hoi te hau i to ratou faatereraa maitai i te mau ohipa i te fenua Tinito.

Ua tupu te hoé maí rahi roa i nia i te hoé pahi Marite i to'na tere mai te oire New York e tae roa'tu i te oire San Francisco. Ua tere maitai oia mai New York e tae roa'tu i te fenua Panama, e i reira taua maí ra i tupu ai, e no te rahiraa o te mau taata tei roohia e te reira ua pau roa te maa raau no te pahi. Imi ihora te mau taote e te mau vahine tuati i te ravea ia ora'i ratou, iritihia aéra te mau piha vairaa maa, e ua horoa-noa-hia te û apí e te anani e te tahi atu â maa maitai ia ratou. Ua haapuai-atoa-hia te radio, e ua faataihia te mau pû i to ratou imiraa i te ravea ia oaoa'i te mau taata ia ore to ratou mau manaó i tae i nia i taua maí ra. Ua tapae taua pahi ra i te oire ra i San Francisco i te 25 no Mati, e ua ora e hoé tauatini e piti hanere taata no te mau horo patete, e ua maurnuru roa ratou i te mau taata faatere pahi no to ratou itoito i te imiraa i te ravea ia ora'i ratou atoa.

Te vai ra e hoé pereoo uira apî no te hoé taata Bareta-
ne, o Major Segrave te i'oa no taua taata ra. Ua afaihia
taua pereoo ra i te fenua Marite i te tufaa fenua Florida no
te tamataraa o to'na puai. Ua tere oia e hoé hanere e ono
ahuru e ma ono maile tiahapa i te hoé hora, e no reira ua
hau to'na vitiviti i to te mau pereoo atoa. E hoé tauatini
puaahorofenua ia te faitoraa o te puai no te machine i roto i
taua pereoo ra.



NA TAATA "MOMONI" I ROTO I TE TAMA'I RAHI A'ENEI

Aima G. Burton Imprimeur,
Rue Brea et de la rue Dumont d'Urville, Orovini, Papeete